

րունդ պահպանում է իւր յիշողութեան մէջ դոքա անցեալ կեանքի փշրանքներն են՝ կապուած այս կամ այն եղելութեան հետ: Աւանդութիւնները զարթեցնում են ժողովրդի մէջ կրօնական, հայրենասիրական և այլ վե՛մ զգացմունքներ, որովհետեւ կազմուած են այնպիսի անձնաւորութիւնների և կամ վայրերի մասին, որ սրբացած են ժողովրդի համար: Իրաւամբ, ուրեմն, աւանդութեան վերայ կարելի է նայել իբրև ազգայնութեան որոշիչ մի տարրի վերայ:

Գրականութեան պատմութեան ուսումնասիրութիւնը պարզում է բանահիւսութեան մեծ նշանակութիւնը նաև գրականութեան համար, որի տեսակները ժողովրդական բանահիւսութիւնից են առել իրենց ծագումը: Յունաց մատենագրութեան ուսումնասիրութիւնը անհերքելի փաստ է տալիս դորա համար. դրամայի, քնարերգութեան, վիպասանութեան սաղմերը ժողովրդական վէպից են հետզհետէ զարգացել և ինքնուրոյնութիւն ստացել¹⁾: Գրականութեան պատմութեան և գեղասիրական տեսութիւնների ուսումնասիրութիւնը մեծ կապ ունի ժողովրդական բանահիւսութեան հետ, տեսութիւնը գեղարուեստական երկերից պէտք է հանել իսկ Ելիականը, Նիբելունգների երգը, Ֆրանսիական Chansons de Roland-ը, սերբիական դիւցազնական երգերը ժողովրդական վիպական բանահիւսութեան յաւիտենական կոթողներն են: Նշանաւոր բանաստեղծներ օգտուել են ժողովրդական նիւթերից իրենց երկերը ստեղծելու համար. Շեկսպիրն իւր գլուխ-գործոց Համլետը զանիական աւանդութիւններից ստեղծեց:

Այսպէս տեսնում ենք, որ բանահիւսութիւնն էլ իբրև մարդկային մտքի, զարգացման և երևակայութեան արդիւնք, իբրև գեղարուեստական ստեղծագործութիւն, արժանի է ուշադրութեան:

Բացի սորանից՝ բանահիւսութիւնը իբրև պատկեր ժողովրդական կեանքի, պատմութեան ուսումնասիրութեան աղբիւրներից մէկն է համարում. իրաւամբ Աեսելովսկին, խօսելով ժողովրդական բանահիւսութեան մասին, յայտնում է այն միտքը թէ

1) Корнь I.